

11/03/1997

PM lawat Johor dua hari

JOHOR BA HARU, Isnin - Perdana Menteri, Datuk Seri Dr Mahathir Mohamad, akan membuat lawatan rasmi dua hari ke Johor pada 13 dan 14 Mac ini.

Dr Mahathir yang akan diiringi isterinya, Datin Seri Dr Siti Hasmah Mohd Ali, dijadualkan tiba kira-kira jam 8.45 pagi di Lapangan Terbang Sultan Ismail, Senai.

Beliau akan bersarapan pagi dengan anggota Jawatankuasa Badan Perhubungan Umno Johor sebelum menghadiri taklimat ringkas mengenai Amanah Saham Johor (ASJ) di Hotel Sofitel.

Perdana Menteri juga akan menyaksikan majlis menandatangani perjanjian di antara Perbadanan Johor dengan Titan Himont Sdn Bhd, sebelum bertolak ke Ladang Nam Heng, Kota Tinggi dekat sini.

Beliau akan menghadiri jamuan makan tengahari yang disediakan di Rumah Rehat ladang itu, sebelum bertolak menaiki bot ke Sebana Resort di Penggerang, Kota Tinggi.

Di Sebana, Perdana Menteri akan menandatangani plak peringatan dan melancarkan `Sebana Homepage' pada satu upacara yang akan turut dihadiri Pengerusi Arab-Malaysian Development Berhad (AMDB), Tan Sri Azman Hashim, pemaju Sebana Resort.

Dr Mahathir dan isteri kemudiannya akan dibawa melawat pameran dan padang golf Sebana sebelum mengadakan sidang akhbar.

Perdana Menteri dijadual pulang ke Kuala Lumpur kira-kira jam 9.30 pagi keesokan harinya. - Bernama

(END)